



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 3

Rishabh Pant Mumbai-i anir aotsü; surgery agitsü: BCCI

Karnataka election atema Congress-i tan ita candidates sangdongtsü



VOL. XX NO. 83 (ADOK 83)

DIMAPUR

YANGTEPNÜ (THURSDAY)

ANEJETI (JANUARY) 05, 2023

₹ 5.00

NE nung tzüsü temelem alatsü

Guwahati, January 4, 2023 (Agencies): Taruba ghonda 24 tsüingda Sikkim, Assam, Meghalaya, Nagaland, Manipur, Mizoram aser Tripura kübok tesem kar nung tzüsü alatsü.

Bodbarñü Sub-Himalayan West Bengal aser Sikkim nung rü tsüktüsü aser January 5 nü Arunachal Pradesh nung tsüingmok atena tzüinglu arutsü. Sikkim nung tanü maximum

aser minimum temperatures kasa dang liasü. Mazitar (Pakyong) nung highest maximum temperature (23.5°C) aser Gyalshing nung lowest minimum temperature (3.5°C) liasü.

Arunachal Pradesh nunga tesem kar nung rü tsükogo.

January 7 nungi Western Himalayan Region nung tsüingsang mejungi akümtsü akok ta IMD-i metetdaktüsü.

Mallikarjun Kharge-i Arunachal & Assam Congress lennirtem den ajurutep

New Delhi, January 4, 2023 (Agencies): Bodbarñü Congress president Mallikarjun Kharge-i Arunachal Pradesh aser Assam nungi Congress lennirtem den ajurutep.

Assam Mahila Congress-i 'Bharat Jodo Yatra' ka agitsü lir aser sentong asoshi Kharge-i moatsü.

"PCC President Bhupen Kumar Borah-i anir Assam Pradesh Mahila Congress teshimtet telok ka den ajurutepa sensaksemogo. Assam nung Bharat Jodo Yatra atema moatsüogo aser state nung party akangshitsü onüktem lemsatep" ta Kharge-i metetdaktüsü.

Congress president Kharge-isa tanga tweet ka nung Arunachal Pradesh unit nungi lennirtem den ajurutepba osang lemsatep.

"AICC Incharge Manish Chatrath, PCC President Nabam Tuki aser tanga lennirtem adenba Arunachal Pradesh Congress telok ka den tanü ajurutepogo. Onoki Arunachal nung yimtenren tensa indang jembiogo. Congress party-i Arunachal Pradesh nung taginüba atema ola adoktsü" ta Congress president-i metetdaktüsü.

Arunachal Pradesh nung 2024 tetenzüklen assembly elections agitsü.

Mahindra Marksman-i LGBTI Airport anüker



LGBTI Airport, Guwahati kima nung Mahindra Marksman ka anena aliba angur.

Guwahati, January 4, 2023 (Agencies): Mahindra Marksman kati Guwahati nung aliba Lokpriya Gopinath Bordoloi International Airport anüktsü.

Bodbarñü Northeast nung tayimtsü anendak tulutiba aser mazüingtiba kima Mahindra Marksman ka yua aliba angur. Iba armoured vehicle ya tanü LGBTIA kishi tongtiba jakdang yua lir.

Mahindra Marksman ya India nung mezüingbuba armoured capsule-based light bulletproof vehicle lir. Iba gari ya small arms fire aser grenade attacks anema amshiteter.


Mahindra Marksman ya

mezüing 2009 küm saya aser Mumbai Police indang Force One-i mezüing amshi. Iba sülen state, central police forces aser paramilitary forces-i iba gari amshitsü tenzüka liaüs. Central Reserve Police Force (CRPF), Border Security Force (BSF) aser Central Industrial Security Force (CISF) temi iba gari amshir.

India nung airports ya CISF sepaitemi anüker anungji parnoki Mahindra Marksman amshitsü.

Mahindra Marksman ya Mumbai Police indang Force One, Delhi Police, Jammu and Kashmir Police, Kolkata Police aser CISF-i kanga amshir.

ENPO-i 2023 Nagaland assembly elections mokdangtsü MHA-i tanü Frontier Nagaland atema lemtet ka agitsü



Dimapur, January 4, 2022 (Agencies): January 3, 2023 nü DUDA Guest House, Sovima nung ENPO rongdak senden ka amendang Eastern Nagaland nung shilem magitsü bangjemtepa aliba akangshio.

Mongulbarñü Chang Khulie Setshang (CKS), Khiamniungan Tribal Council (KTC), Konyak Union (KU), Phom People's Council (PPC), United Sangtam Likhum Pumji (USLP), Tikhir Tribal Council (TTC) aser Yimkiung Tribal Council (YTC) külem senden nung August 26 nü Hotel Saramati (Dimapur) nung bangzüng renemba sülen November 16 (Mon district) aser December 19 (Tuensang) anogotem kasa bangzüng akangshiba ama masetshii noktaker ta metetdaktüsü.

State aser Centre sorkaritemi 'Frontier Nagaland' ta ser state balaka magütsüra Eastern Nagaland nung alirtemi election nung shilem magitsü ta ENPO-i metetdaktüsü.

Union Home Minister, Amit Shah aser AK Mishra (Retd) IPS Advisor (NE), MHA lenisüba kübok 'Central Committee on Frontier Nagaland statehood demand' nung nendaka inyakba atema pelar aser India sorkari Eastern Naga nung taginüba tekaratiba nung ataloktsütsü amanger ta ENPO indang sangdong ka nung metetdaktüsü.

Eastern Nagaland People's Organisation (ENPO)-i January 5, 2023 nü telemtetba ka agitsü.

"Onoki election nung shilem magitsü lemtetogo. Ibaji district 6 aser constituency 20 nung lir. Onoki India sorkar tebilembatem

angadangtsü yongyar" ta ENPO general secretary Manglang Phom-i ashi.

MHA nung Advisor Northeast A K Mishra-i anir ketdangtsü 3-i January 5, 2023 nü Guwahati nung ENPO senden nung adentsü.

ENPO-i "Frontier Nagaland" ta ser state balaka meshir aser iba nung Nagaland kübok backward districts pezü aser Naga kin 7 dena lir.

"Eastern Nagaland nung alirtem renloktsü aser ajungkettsü atema iba ya meshir" ta Manglang Phom-i ashi.

"Eastern Naga tesem aika nung nübortemi tzü tajemtsü tajung mangur. Ayongnu aser tzübo balala nungi tzü ajemba ajanga tashidak aika adoker. Yimtsüing aika nung electricity mali aser higher education institutions tajung mali" ta BJP lennir Suzzane Konyak-ia ashi.

Eastern Nagaland nung high schools, ME schools aser LP schools peria mali aser advanced tribes nungi tesayur aikati Eastern tesemtem nung arua meinyaker. School aika nung tesayur peria mali dang arur aser District tem nung nungdakba mozü kitem mali" ta laisa ashi.

ENPO-i Frontier Nagaland ta state balaka akümtsü akhanger. Taoba ita parnoki iba atema Union Home Minister Amit Shah den ajurutepogo.

Amit Shah-i Hokolbarñü Nagaland semdangtsü sentong lir aser Prime Minister Narendra Modi-ia January 10 sülen Nagaland-i arutsü. Iba sülen jiang telemtetba ka agitsü akok ta osang angazüker.

Amit Shah-i Tripura assembly elections atema nüboyimba tenzüktüsü

Agartala, January 4, 2023 (Agencies): Union home minister Amit Shah-i Bodbar aonung Tripura atongtsü aser asüing pai Rath Yatras tenzüktüsü. Ibaji Tripura assembly elections atema BJP nüboyimba tetenzüker asütsü.

"Union home minister Amit Shah-i Brihostibarnü Rath Yatra ana tenzüktüsü aser iba ya BJP nüboyimba nung shilem ka lir" ta Tripura chief minister Dr Manik Saha-i tanü nikongdang ashi.

North district kübok Dharmanagar nungi rath yatra ka tenzüktüsü aser tangabaji South district kübok Sabroom nung tenzüktüsü.

"Amit Shah taonung Agartala atongtsü. Onoki pa pelashishia agizüktüsü renema lir. Asüing pai Dharmanagar nung Rath Yatra

tenzüktüsü" ta Dr Manik Saha-i ashi.

"Iba sülen pai BJP karyakarta ka kidang chiyungtsü aser idak nung jagi South district kübok Sabroom nung Rath Yatra ka tenzüktüsü atema aotsü" ta paisa ashi.

2018 assembly elections matongdang Amit Shah-i BJP national president ka ama Tripura semdanga liasü.

Amit Shah ajanga 2018 küm Tripura nung BJP sorkar aküm, ta CM Saha-isa shisem.

"2023 election atonger. BJP aser sorkari nübortem atema inyaker. Karyakartas-i pa pelaa agizüktüsü renema lir. Asüing pa Sabroom nungi aruba sülen Delhi-i aotsü" ta paisa metetdaktüsü.

"Tripura nung BJP sorkari Prime Minister Narendra Modi tetuyubatem sülen anidaker. Onoki ochishia inyaker. Onoki social pension teimba kümtsüogo aser onoki ajaklen terenlok atema inyaker" ta CM Saha-isa ashi.

Rath yatra ji January 12 tashi agitsü aser BJP national president JP Nadda-i tembangtsütsü, ta Tripura BJP president Rajib Bhattacharya-ia ashi.

"Rath yatra anaprongi assembly constituency 60 prong asemtsü. Tangalen nungi lennirtem arua shilem agitsü. Locket Chatterjee, Himanta Biswa Sarma, Subhendu Adhikari, Sarbananda Sonowal, Mithun Chakraborty, Kiren Rijuju aser tanga lennirtem arutsü" ta Bhattacharya-isa ashi.

Lhisemia Khel kum 65 ajungba anogomung mungogo



Kohima, Aenjeti/January 04 (TYO): Kohima Village nung 65 buba Lhisemia (L. Khel) Day sentong Indoor Stadium Kohima, L. Khel nung January 4, 2023 nü munga liasü, kong Nagaland Building and Other Construction Workers' Welfare Board (NBOCWVB) nungi Dr Kekhris Yhome ya alakteta jaoker ama arua dena liasü.

Iba sentong nung jembidang Yhome-i lanu putu nung tetsü-tebou sobaliba aser yimsü-yimbong kanga kera sama aser melenshia aoba indang shia liasü.

Anungji pai taintem dang tetsü-tebou nungeri amshiba sobaliba aser yimsü-yimbong

ya wazüka ayutsü asoshi lanurtem nem angazükdaktsütsü ayongzük.

Lokti ka tejakleni renloka aotsü atema mangdang shidak nüngdaker, aser kanga kera yimitem renloka aoba nung ajaki pei anasa kechi ataloker aji kanga junga meteta alitsüla, ta ashi.

Yhome-isa nüburtem dang kati ka akumtsübuwa ajak lungjemer alitsü ayongzüka liasü.

Iba sentong nung Lhisemia Council chairman, Ayie Yhome-i salem o jembi aser Lhisemia Gate Houdo aser Building Committee indang osang agüja liasü.

Iba sentong nung menden Lhisemia Council vice chairman Zapuvizo Liezietsu liasü aser Parish Priest St John the Evangelist Church, Khonoma, Rev. Fr. Dr. Visosieo Solomon Vizo-i sentong tenzüka sarasadema liasü.

Mengukhrietuo Marcus Dvüvichü ajanga tongti zülur osang agütsü aser Zapuvizo Liezietsu ajanga kimen osang agüja liasü.

Sentong nung Dzüvingunuo Kelio, Keneisenuo Sorhie aser Seyiekuonuo Yhome nungeri temeja ken aten aser Neiketouzo Suokhris-i melepzung o jembia liasü.

Wokha DC-i senso candidate meshimtsü metetdaksü

Dimapur, Aenjeti/January 04 (TYO): Deputy Commissioner, Wokha, Ajit Kumar Ranjan, IAS ajanga sangdong ka nung, 14th Nagaland Legislative Assembly asoshi taruba General Election atema lokti tentet/putu menden/tzükong tentet temi senso candidate shimra, itemji Indian Penal Code kübok ozüing balala nung aibelener asütsü, ta ashi.

Yirutsütsü mesüra vote m a g ü t s ü d a k t s ü t s ü amokmerenba densema pei vote agütsütsü temeden nokdangtsü merangba inyakyim tem ya IPC indang Section 171 C, 339 aser 340 kübok aibelen lir, ta sangdong ajanga ashi.

Representation of the

People Act 1951 indang Section 125 kübok election dak sendakba nung tamangba yimsü, kin-kidong, caste, community mesüra oshi-oben nung ajemdaker tsükchitep adokdaksütsü merangba ya aibelen lir aser itemji IPC indang Section 153A, 153B, 295A aser 505 (2) kübok merenshitsu, ta ashi.

Kasaji Election Commission of India-ia tesüiba mapang nenshia shia lir aser totuyuba tem agütsüogoo aser ano nisung ka tenüing menüksüsa lokti tentet mesüra kijai o jembiba aser sangdong agütsüba aitsür, ta ashi.

Lokti tentet temia kasa nung aibelena tarutsü anogotem nung

sentong/inyaksangshitsu asoshi temelaba magütsütsü. Maneni The Nagaland Village Council Act 1978 indang Section 15 kübok putu menden ya administration indang teyariteper ka asünung, election dak sendakba nung shinga dena matentsüla, ta sangdong ajanga ashi.

Anungji nüburtem/tzükong tentet/putu menden temi item ozüing meteta senso candidate shimba mesüra election inyakyim nung pei temeden amshiba nung tetsükdaksü agütsütsüsa inyaksangshiba nungi pila alitsüla.

Lokti tentet/kija shirisa item nung aibelendir tapet ozüing kübok merenshitsu, ta sangdong ajanga ashi.



Deputy Commissioner Office, Chumoukedima nung January 4, 2023 nü EVM/VVPAT awareness atema mobile demonstration van ka Deputy Commissioner aser DEO Chumoukedima, Abhinav Shivam, IAS ajanga sayaja liasü.

MULUNGNEN O



Onoki teti meima aliba ojala aser otsüla asür **TSÜKJEMNUNGLA AIER** W/O Lt. Tareptsungba Jamir Mopungchuket 20/12/2022 anogo nung iba akümüli tempanger onok mangyim jashi nung alidang, kija, kiyongertem, yimden, arogo, kinungertem, tembartem aser telok palalai ozü den sarasadem, nübu, rongsen aser shisatsü agi nongita yariogo nenok ajak dang ozüi kangasa pelaba lemsateper.

Ozüi nenok ajak dangi tsüngdong arua tepelaba melemsateptetba atema nemjema bilemer saka teyanglur Tsüngremi nenok kija aser kibongtem mola moshia moajangma ta ozü tamang sarasadem.

~ Temeim Chimurtem, Semchirtem, Anükapang, Sosemdangsem & Kinungertem.

Dimapur nung mejangjaba nisung tasü mang ka nguteta lir

Dimapur, Aenjeti/January 04 (TYO): Dimapur kübok West Yard Colony nung January 2, 2023 anogo mejangjaba nisung arishi kum 30-35 tsüngta tain ka lenmang anasa süa aliba ngutet, ta Dimapur Police sangdong ka ajanga ashi.

Iba nisungba asüba nung tim masüba mapa inyakba mongutet aser kechi ajanga asüar meputeti lir.

Ozüing agi melaba maparen

ajak tembangba sülen tasü mang ya PM examination/jangjatsü asoshi Dimapur District Hospital nung bener oa lir. Nisungba ya Nike Sweater sensü tenenya aser track pants sensü tanak semer liasü.

Kibur, kinunger, tembar temi Officer-in-Charge, Sub-Urban Police Station, Dimapur den Mobile No. 7085055026 ajanga tongteprateptsü metetdaksü, ta sangdong ajanga ashi.

Tripura assembly election nung BJP nübuyim Amit Shah-i tenzüksütsü

Agartala, Aenjeti/January 04 (Agencies): Union Home Minister Amit Shah ya Bodhbar aonung Tripura tonga arutsü aser Brehostibarnü Rath Yatras tenzüksütsü, koba Tripura nung assembly elections asoshi BJP nübuyim tetenzüker alitsü.

Bodhbar nikongdang osangbener den jembidang Tripura Chief Minister Dr Manik Saha-i ashiba agi, BJP nübuyim nung shilem ka ama Union Home Minister Amit Shah-i Rath Yatras ana tashi tenzüksütsü.

Rath Yatra ya ka North district nung aliba Dharmanagar nungi tenzüksü aser ka South district nung aliba Sabroom nungi tenzüksü.

"Union Home Minister Amit Shah ya taonung Agartala atongtsü. Pa agizüktsü onok ajak renema lir. Asüing pai Dharmanagar nung Rath Yatra tenzüksütsü aser yangji nüburtem adenshia alidak jembitsu," ta Tripura CM Dr Manik Saha-i ashi.

"Iba sülen pa BJP karyakarta ka kidang chi chiyongtsü. Yangnungjagi onok South district kübok Sabroom nung ano Rath Yatra ka tenzüksü aotsü," ta Tripura CM-i ashi.

2018 assembly election magidang Amit Shah ya BJP

indang national president ka ama Tripura semdanga liasü, ta pai ashi.

Pa ajanga state nung 2018 kum BJP sorkar tentet, ta Dr Saha-i ashi.

"2023 election arur. BJP aser sorkari nüburtem asoshi inyaka arur. Karyakartas ajak pa agizüktsü renema lir. Asüing ba Sabroom nungi Agartala-i arutsü aser Delhi-i aotsü," ta pai ashi.

Tripura nung tang aliba BJP sorkar ya Ato Kilonser Narendra Modi totuyuba nung inyaker, ta pai ashi.

"Ozüi sorkar ya temerek/ ochishia inyakba sorkar ka lir. Onoki social pension timba kumtsü. Ajaklen terenlok asoshi onoki inyaker," ta Tripura CM-i ashi.

Tripura BJP president Rajib Bhattacharya-ia rath yatra ya January 12 tashi alitsü aser BJP national president JP Nadda-i tembangtsütsü, ta ashi.

"Iba rath yatras yagu assembly constituency 60 awajemtsü. Dangalen nungi lenirtem jenti arutsü. Locket Chatterjee, Himanta Biswa Sarma, Subhendu Adhikari, Sarbananda Sonowal, Mithun Chakraborty, Kiren Rijju aser ano dangartem arutsü," ta pai ashi.



January 04, 2022 nü New Delhi nung Delhi nung taoba mapang home guard temi Delhi Chief Minister Arvind Kejriwal'er kima longkak aitba noksa nung angur.

Centre-i J&K nung ano CRPF company 18 tali lezmüksütsü

New Delhi, January 04 (Agencies): Tawa ano kiralongrartemi Jammu & Kashmir kübok Rajouri district anaben amakba aser civilian asüba nung ajemdaker Centre sorkari Central Reserve Police Force (CRPF) sepai company 18 tali lezmüksütsü.

CRPF company 18 nungjagi sepai 1,800 ji Jammu region-i yoktsü aser sepai teimbaka Poonch aser Rajouri district na nung lezmüksütsü.

Osang angazükba agi, Jammu & Kashmir tesem balala nung aliba CRPF company 8 district ana jagi yoktsü aser CRPF company 10 Delhi nungi yoktsü.

Intelligence osang ajanga

kiralongrartemi Jammu region amaktsü metetdaksüba sülen ministry of home affairs-i tetuyuba kar agüja lir.

Amongnü nikongdang aser Hombarneep (January 1-2) Jammu & Kashmir nung Rajouri district kübok kiralongrartemi Upper Dangri yim amakdang tanur ana densema nisung trok tepset aser nisung aika yirua liasü.

Hombarneep Upper Dangri yimdak Improved Explosive Device (IED) bomb ka pokdaktsüba lendong nung tanur ana asü aser aika yiru.

Amongnü nikongdanga Upper Dangri nung kiralongrartemi injang amshia amakba lendong nung nisung pezü asü aser aika yirua liasü.

Item tatalokba ana nung nisung 12 shi yiru aser yirua alirtemji Jammu hospital nung mongdar.

December 16, 2022 nüa Rajouri district nung Army camp ka anasa nisung ana khasetba sülen nungi tensa mejungi aküm.

Jammu & Kashmir LG, Manoj Sinha-i item tatalokba nung takoksa angur kibong shia nem sen lakh 10 agütsütsü aser sorkar mapa agütsütsü nangzükogo. Iba dak alia kanga mejungi yirua alir shia nem sen lakh kaka agütsütsü sangdongogo.

National Investigation Agency (NIA)-ia iba yim semdangba sülen security akangshiogo.

Karnataka election atema Congress-i tan ita candidates sangdongtsü

Vijayanagara, January 04 (Agencies): Congress Legislature Party lenir aser taoba mapang Chief Minister, Siddaramaiah-i, Karnataka assembly election atema Congress-i tama candidates sangdongtsü tebilemba lir, ta metetdaksü.

State assembly nung opposition lenir, Siddaramaiah-i, taruba assembly election nung Congress-i taklok ngua sorkar akümtsü, ta ashi.

Karnataka nung assembly election April-May ita nung agütsü.

Tasüngdangba ka langzüdang pai, "Tan ita onoki (Congress) tama candidates

sangdongtsü tebilemba lir," ta metetdaksü.

Party ticket nungi tokteptsü atema nisung 1,350-i ticket meshiba dak sendakba nung pai, "Congress party dak tashi tulu lir, ibayongji nisung aikati party pusemer aser aikati party ticket meshir," ta metetdaksü.

Siddaramaiah aser State Congress Tir, D K Shivakumar napronglai chief minister candidate süner, aser tena pusemertemi constituency 80 nungi party ticket meshir.

JD(S)-ibo Karnataka election atema candidate 93 sangdongogo aser ruling BJP-ibo tang tashi telemtetba

magi.

Party tasenba 'Kalyana Rajya Pragati Paksha' ajanga Congress tajangzük angütsü, kechiyong party tasenbaji ajanga BJP votes lemsatsü, ta shia Siddaramaiah-i, "Onoki (Congress) tanga party dak memetaloker. Onok kijai takok angütsü. Party tasen künnertemi kümang mesüra BJP aser JD(S) nati kechi jembinerar jembiang, saka onoki takok angütsü," ta ashi.

Karnataka nung Congress sorkar arutsü nükjidong nung party-i assembly menden 224 nungjagi menden 150 nungbosa takok angütsü nükjidong yur maparen tenzükogo.



January 04, 2022 nü Baghpat district nung Congress lenir, Rahul Gandhi aser tangartemi Bharat Jodo Yatra nung shilem agiba noksa nung angur.

China-i tezüngzüktep akhüm metsübuba agi tensa raksa: EAM

New Delhi, January 04 (Agencies): China-India arrtsülen tesünep alitsü atema tezüngzüktep yanglua aliba China-i akhüm metsübuba ajanga LAC (Line of Actual Control) nung tensa raksa, ta India foreign minister, S Jaishankar-i ashi.

Vienna nung jembidang External Affairs Minister, Jaishankar-i, China-i parnok melungka agi LAC nung temelenshi adokdaksütsü merang, ta aitsü.

Austria nung interview ka nung jembidang Jaishankar-i, India aser China nati arrtsülen sepaitem aika mayutsü bangjema liasü, ta ashi.

"Onoki (India-China) peisasa Line of Actual Control (LAC) memelenshitsu bangjema liasü, ajisüaka parnok (China) parnok kijai LAC melenshitsu merang," ta pai ashi.

China-ia India nem kasaji tai

tongloktsüra koda?, ta asüngdangba langzüdang Jaishankar-i, "Tanübo satellite noksatemji kanga teladak aser tejangja. Shirnoki mezüng arrtsüleni sepaitem yokar ibaji asenoki reprangdangra kanga tejangja angütsü. Anungji China-ibo onok nem tai tongloktsütsüji tasak asütsü," ta metetdaksü.

December 9, 2022 nü Arunachal Pradesh nung Tawang sector kübok LAC nung India aser China sepaitem tsüngda rara adoka liasü aser sepai kar yiru.

2020 küm June ita nung Galwan Valley nung India aser China sepaitem tsüngda rara adokba sülen linük ana tsüngda tensa mesüngjemteti arur.

Iba tatalokba sülen arrtsülen mangatettep bentettsü aser yimjung alitsü atema linük ana nungi tongti ketdangsertem tsüngda senden 17 ben tashi menogo.



January 04, 2022 nü Dharamsala nung asükwa mongpu state assembly tenzükba anogo nung Himachal Pradesh Chief Minister, Sukhvinder Singh Sukhu-i Opposition Lenir, Jai Ram Thakur den salemba noksa nung angur.

DD aser AIR terenlok atema BIND scheme agizükogo

New Delhi, January 04 (Agencies): Prasar Bharati broadcast infrastructure aser network terenlok atema Bodhbarnü Cabinet Committee on Economic Affairs (CCEA)-i Doordarshan aser All India Radio asoshi sen crore 2,500 indang scheme ka agizükogo.

Information & broadcasting minister Anurag Thakur-i, Central Sector 'Broadcasting Infrastructure and Network Development (BIND)' scheme atema CCEA-i sen crore 2,539.61 agizükogo, ta metetdaksü.

"BIND scheme ya Prasar Bharati indang broadcasting infrastructure terenlok atema Prasar Bharati nem senotsü teyari agütsütsü asoshi scheme lir," ta I&B ministry-i metetdaksü.

"Prasar Bharati ya linük indang public broadcaster lir aser iba ya Doordarshan aser All India Radio (AIR) ajanga nüburtem nem, talisa linük nung kanga tezülen aliba nüburtem nem kanga tongtibang osangtsüsang metetdaksüba, shisaliok agütsüba aser amalitepba tsütsü kanga tongtibangtiba hadir lir," ta I&B Ministry-i metetdaksü.

"Coronavirus wara mapang nunga health tsütsü nüburtem nem osangtsügang

metetdaksüba aser awaranness agütsüba nung Prasar Bharati-i tongti shilem agi," ta ministry-i metetdaksü.

BIND scheme kübok facilities tajungba akmtsü aser channel teimba akümtsü. OB vans alitsü aser DD den AIR studios nung digital jenjang tajungba küma yanglutsü.

Thakur-i, "Prasar Bharti ya public broadcaster ka. Iba ya tajangzük angütsü atema dang masü saka nüburtem nem sorkar mapa aser schemes metetdaksütsü atema lir," ta ashi.

I&B ministry-i ashiba agi, tang Doordarshan indang 36 TV channels 36 lir aser item rongnung regional channel 28 lir. Ano AIR-i broadcasting centre 500 dak tema ketdangsur.

BIND scheme kübok linük nung AIR FM transmitters agi litsü shilem 66 ayimjemtsü (tang shilem 59 ayimjemer). Iba dak alia tang linük nung nütsüng shilem 68 ayimjemba nungi ano teimba küma nütsüng shilem 80 ayimjemtsü.

BIND scheme kübok DD Free Dish DTH set top boxes (STBs) lakh 8 angati lema agütsütsü aser itemji kanga tezülen alirtem, tribals, Maoists-i timtem agütsüba tesemtem aser arrtsülen alirtem nem agütsütsü.



TIR YIMYIM YIMOBILEM (EDITORIAL)

DIMAPUR YANGTEPNÜ, AENJETI (JANUARY) 05, 2022

Taküm-a election lu ayimtsü na ?

Taküma küm tasen ka tenzüker, anungji asenok aika mulungjang nung taküm küm-a kechi lu ayim nung tajungba asütsü ta bilema alitsü. Atangji, tanü putu nung aluji tsük lu dangbo masü, saka asenoki asen taküm aser kibong asoshi kechi inyaker, aji asen lu akümer. Aji oda, tanü asüngbo nisung aika office nung inyaker aser dokan lapoka shishir, anungji parnok asoshibo itemji par lu lir. Ajisüaka, nisung teimbaka anogo shia inyakba mapa ka maka alirtem lir. Item purtem asoshi tang amai küm tenzükdang, küm piyong inyaktsü asoshi alu ka shimtetsü nungdaker. Atangji, tanü asüngbo ano nisung aikati akhidang tsük lu ayimba mesüka aluyimtsü asoshi ali dangi meyiper aser tsük lusa mesüaka bonglashi lu, somomo lu, mamazü lu, züngi lu, kozü lu, süngo lu, rubber lu, süngjanglijang lu aser naro lu ama ayimer. Ano, karibo mongmong lu, mersü lu aser bengana lu ama alu tapu aika ayimer. Tsüngremi dang anü aser tzünglu mapang shitak nung yokra, item alu ayimba ajak nungji tajangzük lir. Itemji dang masü saka ano asenok aikati ak, an metsür aser ango tzübo yanglua ango metsür. Ano, teinyakner metenbo süng long aser ali mapa inyaker meinyakma lir. Item lutem rongnungji asenoka alu kabosa shimteta inyaktsüla. Aji mesüra asenok mapa-a maka aser chiyongtsüa maka ta meshimetsür mesüra ashirauer akümtsü. Ajisüaka, taküm 2013 küm yabo Nagaland nung election küm, anungji, ashiko, asenok karibo election lu ayimtsüang bilema alitsüa akok. Iba amaji bilemer ali nungbo, taküm election nunga timtem lendong agütsürtem kanga alitsü. Election lu ayimertemi candidate dang sen meshir vote alia jajar aser ano nisungtem tsübudaktsütsü asoshi sentong tamajung yanglur. Candidate indang sen chitsübaji item election lu ayimertemi chitsür, kechiyong parnoki candidate dang vote ayimtsü sen meshia amshibaji tesadang kabo parnoki agiadoker. Iba ama tajangzük aliba jagi, talisa asen lima nungbo election kumbo shinga kecha lua mayim election lu ayimtsü atar ta jembir. Iba jagi asenok election-sa election süika nisung maküm tim tatemala aser tesensakba akümer. Election lu ayimertemi anguba senji ochimashi len nungi anguba angati sen, anungji azükaru masür. Aji oda, election süirbo alu tayimtsü maka yimtaka melitet aser bendanglena tekaodak maka ta nemzuba purtemji election lu ayimertem lir. Item ama election lu ayimer mali nungbo, election nung candidate-tem sen aikabo meindoktsü, kechiyong nübertem rongnung pei vote senyong yoknüba kar aliyonga, teimbakati pei vote yoka mechii peisasa ochishia enoktsütsü tangatetba lir. Joko, asenoka zünga shia metetba aser Yisu Khrista temeim osang tajung meteta amangba nung küm noklang dak tali tain rogotem lir, anungji election lu yimabo asenok taküm aser kibong mesüa alitsübo mebilemetsüla. Election lu yima vote agütsüba anogo nung tangar vote dena enoktsüba agi asenok tebok süngabo melitettsü. Aji oda, election lu ayimba agi election mapang yi jemer injang amshia tangar amokmerena jajaba agi asen kibong aser chirnurtem tesünep nung malitsü. Atangji, senso tajung ka asünungji, election nung shilem agia pei vote enoktsütsüla. Ajisüaka, election agi pei lu kümer, tangar meyong sen meshia semer vote alia mejajatsüla. Aji oda, election nung candidate dang meshiba sen agi asen kidang chipo tongdaktsü aser chirnurtem anepalutsü mebilemetsüla. Iba senji asen atema temoatsü masü atakatem asütsü. Iba atakatemi asen tendak asen dakbo mekaotsüa akok saka alima nung asenbo mali ser asen chirnur aser semchirsemnurtem dak kaora koda asütsü (?) ta bilema election lubosa mayimtsüla. Alima nung ya asen nungdakbo aseni ayimba lu nungi peria ngutetsüsa Tsüngremi agüja lir, anungji asenoki kechi jangraa aser junga inyaktetter, iba mapaji Tsüngremi asen nem lemzüktsüba lu ta angateta asenoki nendaka inyaktsüla. Tanü tashibo asen lima nunga nendaka inyaknertem asoshibo mapa (alu) tajung inyaker meinyakma aser alua yimer meyima lir, anungji kechi lu ayimtsü ta asübajiang Tsüngrem dang asüngdanga ayimtsü junger. Aji süra, pei peri dang masü tangar nema agütsütetsüsa yimtettsü.

OLEMSABANG

Antepong akong tenzükogo:

~ Chubatemjen Ao

Tanur asüba mapang, English angazük tenzükdang, ni' mezüng sangro azüng angazükbaji "Cocks crow in the morn to let us rise..." (anepdang antepongi asenok sakdaktsütsü akonger...) ta asüba sangro liasü.

Tawa, kodang ni osang kaket nung, " Shürho sounds poll bugle..." (Shürhoi election ola adoker) ta angu, antepong koba telok nung ni dena lir, iba jagi Naga nungertem dang yakta Nagaland yimten lenisüba nung anogo tasen ka adoktsü tenzükogo, anungji sakang ta shia akong tenzükogo ta menungraa bilemogo. Naga nungertem ya yimten shitakba maparen toktsür mejanga lir, anungji tang ya saktsüba mapang aser asenok tsüraburtem nungi amanga aruba Naga yimten otsü aser sobaliba wazüka ayutsü aser tejakleni anitsü atema temulung ajak agi bendanga agüja inyak tenzüksüla ta bilemer.

Iba onük nung ya asenoki asen senso jenjang jangjatsü nungdaker. Shitakba nung Naga nungertem ya senso temeten ana agia alir. Officially, asenok ya India nunger saka shitakba asenok ajak mulungjang nungbo asenok ya Naga nunger. Anungji, yimten tangatetba shitak ayutsü atema, asenok mulungjang nung aliba senso jenjangji mesamadaktsüi shitak wazüka ayutsüla.

Onük: Ochishir nisungji shiba (Who is the honest man)

~ Toshi, Kohima

(Yashi adok nungi...)

Asenok Aor Rev.Dr kati yamai ashiba ni angashi. Nagaland ya glorification of curoption agi sunga lir. Aji pai anguba tenuk küli ajanga pai tasü ita ashir ta sangdong. Aji shidak asünungbo asenok Naga nunger Khristan ta nüma danga jembirtem ajaki kanga junga shisadangtsüla ta bilemer.

Nagaland nung election ya lepnuzük küma aor ama ajiteter. Asenok nem pei mulungba shimtsü temeden agütsüba asenoki ajebasa intoker ama kümogo. Anungji taruba elecion nungbo yi melena nashi mamatzü temeja chibo nung moluzüka yutsür jemdaktsünungbo merarareptsü ta bilemer. Yi agibo temesen jetzüka yoker nisung südaktsür. Tongtipangsa yi ajemertem covid 19 vaccine agir ano maneni yi jemra ajungbena temolungjangzü pokma asütsü ta ashir. Mamatzü jagibo sentsü tajungba kümdaktsür, temang anema yutsür. Ibaji shidak asü masü taruba election nung pei sasa tendangang.

Anungji asenoki ochishir MLA aginüra election nübuyim mapang mezüngbuba pa taküm küli shidaktsütsü aser tarutsü lanu putu atema pa nükla kechi ta asüngdangtsü. Ibji tanü putu ya overloaded information putu asünung social media ajak nung prokshitsü aser ibaji archive kar nung kanga junga rezünga ayutsü aser tarutsünung ibaji medemdanga libalirutsü tajung ta bilemdi.


MLA inyaknür aika kümogo, kechiaser MLA akümba agi takar akümer ta Naga nungeri metetogo. Anungji Civil Society nung President shimba ama Yim ajak tena tena MLA inyaktsü lemtet nunga koda süla. India sorkari küm ka nung sen kwi Nagaland-i yoker iba nungi sorkar tenzükertem itasen agiteta yur tanungbaji District 16 kasasa lemsar pei pei jaka nung yimsüsüri anir nübu yoka leman yanglutsü, milen tesangwa aser tajemtsü tzü bener aruba mapa inyaktsü. Sen kwi arur ibaji social media ajak nung agütsütsü. Iba sen nungi mapa inyaker ajak nübu aruba apir anogoshia hajara agütsütsü. Tanü asüngbo MLA ajak itasen agir. Anungji parnoka sorkar tenzüker den sakü pei itasenjagi kibong mesüa lokti mapa inyaktsü ta lemtetet nung kanga ajungtsü ta bilemer.

Senden nungbo MLA ajakji public service asen Aor Putu Menden nung tatar amai züngshir aser inyaker. Anungji Public sen meyimzüka achitsü leman mali.

Tatamsa asenoki ochishir nisung sebteta metettsü atema temalen shisemba onük ya kanga junga shisadang nung kanga ajungtsü ta bilemer. Yisui ashi " Mulungsentsü merükmerüka alirtem temoatsüba kchiaser parnoki Tsüngrem angutsü " (Mathi 5:8) Ashikülak mali temulungsentsü temeruk nisungji ochishir nisung. Itemji tanu Naga nungertemi nungdaker ta Tir Yimyim azünger ajak ayongzüker. Tsüngremi Tir yimyim azünger ajak mojang

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

India nungger Khristan lenir, Francis Sunderaraj süogo



Francis Sunderaraj

January 04, 2022: India nung Khristan shisaliok ajungkettsüba nung kanga tongti shilem agir, Francis Sunderaraj taoba ita süogo; pa arrshi küm 85 liasü.

Francis ya Evangelical Fellowship of India (EFI) indang Christian education department nung tongti liasü aser India nung Sunday school curriculum teimbaka pa lenisüba kübok yanglu. India nung Sunday school curriculum ya oshi 32 nung meyipzükogo.

Par medemer, Saphir Athyal-i, "Loktiliba nung Kibuba tenzükdahtsü atema nisungtem nem training agütsüba kanga tajangzük anguba ministry ka lir, ta pai bilema liasü," ta ashi.

India nung Evangelical maitsü tajungba akümba aser longjemdaktsüba Sunday school curriculum ajanga lir ta bilemer.

"Arogo aintsü atema shisaliokji kanga tongtibang. Tsüngrem yimli yangertsü

atema asenoki rangloker inyaktüsü," ta Francis Sunderaraj-i jembia liasü.

Francis Sunderaraj ya Tamil Nadu yimtiba, Chennai nung middle-class Anglican kibong ka nung aso. Pa 1937 küm April 7 nü aso.

Pai choir nung ken tena liasü aser tekülem sentong nunga 'altar boy' inyak saka pai iba dang nungjagi shilem tuluba agütsü tejangraba liasü.

Pa arrshi küm 17 asüba mapang nung Youth for Christ senden ka nung aden, iba mapang nungji England nung putir kati sayutsüngi aser Sunderaraj-i Khrista nem pa taküm bendanga agütsü.

1957 küm pa chemist aküm aser pai Kibuba tenzükba wadang inyaknüa liasü ajisüaka par kibong mesütsüsa akümba ajanga Chennai nung paint manufacturer mapa inyak; iba sülen pa Kolkata-i ao. Pai maneni yangji küm pongu tashi kasa mapa inyak saka Kibuba tenzüksü atema pa melung

nung tejangraba liasü, ibayongji pa mesüngjemteti liasü.

Iba sülen pa Yavatmal, Maharashtra nung aliba Union Biblical Seminary nung azüng aser maneni Princeton Theological Seminary nung azüngtsü atema World Council of Churches nungi scholarships angu.

Ben-Hur, The Ten Commandments aser The Robe ama Khristan film tem reprangba ajanga pa tanela maneni asüngsashi aser Tsüngrem den tesendaktep ano tajungba aküm.

Pa iba seminary nung graduate asüba sülen Malaysia-i ao aser Methodist Arogo ka nung mapang talangka pastor inyaka liasü.

Tesülen pa Kaula Lumpur nung aliba Tamil nungger Arogo ka nung tenzük aser Evangelical Fellowship of India (EFI) nung inyaktüsü atema 1978 küm India-i meyipa aru. EFI nung pa atema tongtibangtiba mapaji Sunday school curriculum liasü.

Tang Global Spiritual Care Networks & Singles Asia nung Tir, Leela Manasseh-i, "Pa [Francis] ya nüburtem atema lenir liasü. Pai tanurtem aser lanurtem den atongsema inyak aser loktiliba nung aika tenzük aruogo. Laishiba nung ajemdaker, Khrista tiyongtsü südaktsür aser tanela tashi ajanga pai Kibuba tenzük aruogo," ta ashi.

1984 küm Sunderaraj ya EFI nung tongti aküm aser 1994 küm Evangelical Fellowship of Asia nung general secretary akümba sülen 2001 küm tashi inyak.

Arogo nung tetsürtem nem tongti menden agütsütsü atema pai inyak aser India nung dang masü Asia tashi nung evangelicals maitsü tashi itdaktüsü atema pai inyak.

World Evangelical Association (WEA) general secretary, John B. Samuel-i, Sunderaraj-i Tsüngrem yimli yangertsü atema temelungtetba tulu nung inyak, ta ashi.

Francis Sunderaraj-i pa kinüngtsü, Sheila Bhanu jala Mallika Ruth aser jabaso Vinodh Samuel nungger toktsür pila.

Kaduna State nung Khristmas mapang Khristan aika tepset

January 04, 2022: Khristmas anogo nung Fulani teloki Kaduna state kübok Angwan Aku yim amak; anepdang 10:00 ako meta tekülem sentong tenzüksü lia Khristantem amak, ta International Christian Concern (ICC)-i metetdaktüsü.

Osangbener den jembidang iba tesem nungji alir kati, "Tenla kidang tekülem sentong tenzüksü lia yimmakertemji motorbike aika nung yim tonga

aruba sülen injang khaloktsü," ta ashi.

"Parnoki Khristan ka khaser aser Khristan 53 puer ao, aser puer aoba Khristanatemji tang tashi mechiok," ta paisa metetdaktüsü.

Khristmas matongdanga Fulani teloki kasa state kübok Mallagum aser Kagoro yimtsüng na amak. December 18 nü Mallagum yimdak Khristan 40 tepset aser December 23 nü Kagoro

nunga Khristan asem tepset.

Kagoro jila nung alir Khristan kati, "Kibongtem alitsü majung kümogo, aser tia kaa taküm kümzükertemjia pei lima nung refugees kümogo. Ozü lima leper agi süngogo aser ozü nüburtemi joko tetsüba agi alu-a meyimteter," ta ashi.

Paisa, "Fulani kiralongrartem 'Allahu Akbar' ta ayimdena nisung tepsetter aser kiojen raksatsür," ta ashi.

ANOGO ABEN TSÜNGREM DEN

Tajungtiba Arutsü Kar (T.Ken 58: 10,11)

Temeshi pur timatemer, tamajunger timmetemi aliba angu dang ne mulung nung tasüngdangba kadaktsür asü? Tatem nung tamajung agi atemba-Khristan mapa nung alira- Pai meinyaktsü tim kar inyaka nungtugo süa akümba kar ngua lir asü? Yamaji lira iba osang yagi na tasü itdaktüsü. "Mang ayangbaji angudang temeshipurtemi pelatsü, aser tamajunger azü nung parnoki pei tetsüng shidoktsü...Atangji temeshipurtem asoshi sempetji lir, atangji alima nung obendangba Tsüngrem ka lir."

Kodang kari na yirutsür, kodang asen mapa mejungi temdir, asenoki khuretji agütsüla aser tanü alima nung ochi obendangbaji mali ta angatetsüla. Atangji idakji ochi obendanger ka lir aser ibaji asoshi asenoki pelar. Saka shirnoki ochi inyaker rishikangshir, tamajung inyaker, parnok temabai tudaktsür. Iba ama ochi mashiba khuretji agizükang. Ibaji alimai inyakba mapatem lir.

Tanabuba, taji Kibuba nem tokjang. Kodang kari meinyaktsü kar inyakdir, idangyongjisa asenoki temeten aginür aser taisangji merenshidaktsüner. Saka aji Kibuba nem tokjang. Pai ashir, "Mangyangbaji Kü meyong. Ni shia agütsütsü" (Rom 12:19).

Tasembuba, Kibuba nung ataa liang. Ne sempet angutsü lir. Mekümzükba pur asoshi iba lima ya kotak lir. Parnoki kodanga Kibuba den tatem maka tepelaji kodanga mangutsü. Saka tamangertem asoshi Kotak yimli arutsüba kar. Kotakji tepela temeja aliba lima lir; molumiji tejashi temeja aliba lima lir. Iba lima nung asenok tepela aser tejashi meyoktepa kar. Ataa liang, kechiaser ne sempet angutsü kar.

Iba lima nung ochi agi anünga lir. Iba nung na shisabulutsü mali. Kodang ne dang ochi mashi inyakdir, khuretji Kibuba nem tokjang aser Pai mapaji bentettsütsü arema ataa liang. Kechiaser Tsüngremer nübur asoshi tajungtibaji arutsü lir.

Algeria nung missionary tem nokdangger aser Tenla kitem shibangtsür

January 04, 2022: Algeria nungger lir. Iba linük nung linük nung sorkar Tsüngrem mezüngmeshiba ketdangsertemi ozüng tesashi aser yimsü toktsüba benokba ajanga Khristan nokdangger; iba dak alia tekülem dak sendakba tenokdangbatem atema missionary temi mission Khrista osangtajung sayutsüngi mesüteter, ta International Christian Concern (ICC)-i metetdaktüsü.

Tesüiba küm ishika tsüngda Algeria nung Tenla ki 16 shibangdaktsüogo aser item Arogoji teimbaka EPA (Evangelical Protestant Association) den affiliate süa lir.

Arogotemi sorkar dang parnok registration agizüktsü mepishir saka magizükba ajanga Khristantem lenla aika nung timtemer.

2006 küm EPA register asüba sülen Arogo aikati registration angutsü atema EPA den affiliate asü saka sorkar denbo registration magiteter.

Algeria sorkari Muslim nungger masüba organizations anema ozüng balala aser tenokdangba balala benoka lir, aser item ozüng alema aibelenra jail nung puoktsü aser senchi tulu achitsü.

Tang Algeria nung nütsüng shilem 99 bo Sunni Muslim

nungger lir. Iba linük nung linük nung sorkar Tsüngrem mezüngmeshiba aser yimsü toktsüba nokdangger; iba dak alia tekülem dak sendakba tenokdangbatem atema missionary temi mission mapa meinyakteter.

Algeria nung nisung kari danga Islam yimsü ainkar, Muhammed anema jembira mesüra mezüngmeshira mesüra Islam yimsü anema inyakra küm 3 nungi 5 tashi tepuokdak ayutsü aser senchi Algeria nungger dinar sen 50,000 nungi 100,000 tashi achitsü.

Iba linük nung Islam yimsü anema inyakba/jembibaji ozüng alema lir aser Muslim nungger ka tanga yimsü dangi meyipdaktüsü merangra temerenshi tulu alitsü.

Iba linük nung Khristantem Tenla kidang dang tekülem sentong agütsü akok saka item nungjia tenokdangba balala lir.

Algeria nung sorkari Sunni Muslim dak alaka tanga yimsü amangertem sademsadema mamangtetsüsa ozüng aika yangluogo, aser ibaji ajanga iba linük nung mission mapa inyaktüsü kanga tasak kümogo, ta ICC-isa metetdaktüsü.

AO OSHI ANGAZÜKDAK:

TANÜ ANGAZÜKTSÜBA OJANG

Ongangla

(n) arasentsür, tia shiteter tetsür (prophetess)

* Limapurtemi ongangla dang asür lima nung alir indang asüngdang.

Ongbang

(n) yim anasa (nearby village)

* Ongbang lu ayimdangbo kangabo mebelemer.



OLONG PAITEP # 6390

Grid for crossword puzzle #6390 with numbers 1-18 indicating starting positions.

TIPLÉN

- 1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _ _ _ _
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

- 1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masu
9. Ajokba shiruru ka
12. Inyaktet
14. _ _ _ hi
16. Akümüli nungi pilar

OLONG PAITEP # 6389 TELANGZÜBA

TIPLÉN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen, 14. Ola,
16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioiktsü,
5. Lenti, 7. Tajangzük, 11. teronem,
12. Sempa, 13. Jahaz.

Agüja aliba noksa nung meputepi aliba 12 bushiang



TEPELA TASOBA ANOGO

- Tenüng : REMRAR TZÜDIR (Molungyimsen)
Tasoba anogo : January 5
Küm : Ka (1 year)
Talidak : Kuda Village, Dimapur.

Temeim tajungti, Na asoba agi kibong tabensaba kuma lemsa lemsa tepela agi sünger tanü küm ka renteta arudang Tsüngrem tenüng sanga na asoshi moatsüa sarasademer. Maneni Tsüngremer sendong tajung tangtetdakjang ni ta arishi meshitsüa na meimer ajaki sarasademtsür.



- Temeim Oja, Oba, Kinungertem aser na meimertem.

TN Governor R.N Ravi-i Chennai nung Octave 2023 tenzüksü



TN Governor R.N Ravi-i Chennai nung Octave 2023 tenzüksü dang tangokba noksa angur.

Guwahati, January 4, 2023

(Agencies): Mapang süia arudang linüki North East atema tebilemba melenshiogo aser India tejakleni aoba otsü nung North East state tem shilem lir ta Tamil Nadu Governor R N Ravi-i ashi.

"North East state tem ya India renlokba nung shilem ka lir aser tanga tesemtem den külemi shilem agir aser tejangraba lir" ta RN Ravi-isa ashi.

South Zone Cultural Centre, Thanjavur kübok Octave 2023 ta ser benjung lapoktsüdang Tamil Nadu Governor-i iba osang metetdaksü. Iba benjung ya North East India nung lisopur art & culture sayutsü atema ayongzüka amonger.

"Tesüiba nung asenoki parnok mangatetba ajanga

timtem aliba tesemtem ama dang bilem, ajisüika tanübo linüki North East indang tangatetba melenshiogo" ta Governor Ravi-i ashi.

"North East nunger dak sempet aika lir, parnok dak tai maket, temulung tanük aser tashi den tejangraba aika lir. North East nunger ya sobaliba aser tanülaren ajanga sendaktepa lir aser parnoki linük renlokba nung shilem agir" ta paisa ashi.

TN Governor Ravi ya SZCC indang Chairman lir.

Paisa iba benjung nung adenertem dang Tamil Nadu aser Chennai semdangtsü ayongzük.

Octave 2023 nung Assam, Meghalaya, Mizoram, Nagaland, Sikkim, Tripura, Manipur aser Arunachal

Pradesh nungi nisungtemi shilem agir.

Octave 2023 ya SZCC, Union Culture Ministry ajanga Open Auditorium, Bharatia Vidyashram, Kilpauk Garden Road nung January 3-6 tashi ayonga amonger.

Anogoshia nikongdang 6:30 nungi 9:30 ako tashi cultural programme alir aser nikongdang 5:00 ako nungi 9.30 ako tashi craft fair & food festival lir.

Iba sentong nung Principal Secretary, Tourism and Culture B Chandra Mohan, Principal Secretary to Governor Anandrao V Patil, director of SZCC K K Gopalakrishnan, Chairman of Bharatiya Vidya Bhavan, Chennai, N Ravi aser Director, BVB K N Ramaswamy nunger aden.

Assam nung civilian award tematiba Dr Tapan Saikia nem agütsütsü

Guwahati, January 4, 2023

(Agencies): Assam sorkari 'Asom Baibhav, Asom Sourav & Asom Gourav' awards angutsüpurtem tenüng metetdaksüogo.

Assam chief minister Himanta Biswa Sarma-i January 4 nü 2022-2023 atema "Asom Baibhav, Asom Sourav & Asom Gourav" angutsüpurtem tenüng sangoktsü.

Assam sorkari agütsüba Asom Baibhav ya civilian award tematiba lir aser 2022-2023 küm atema Dr Tapan Saikia nem iba sempet agütsütsü.

Dr Tapan Saikia ya Naharkatia, Dibrugarh nung alir aser Deesikha Foundation nung patron ka lir. Pai Assam aser NE States nung cancer osang aser putetba maparen nung shilem tulu agia arur.

Dr Tapan ya June 2004 nungi Prince Aly Khan Hospital nung Head of Medical Oncology & Research Director inyaka arur.

Paisa Jaslok Hospital & Research Centre Mumbai nung Director of Oncology Sciences inyaker. Pa Professional Societies /NGOs aika nung dena lir aser Assam nung Cancer Camps nung teti adener. Pai AIIMS, Delhi aser Allahabad University nung MD aser external examiner inyaker.

Asom Baibhav award nung Rs 5 lakhs senpet dena lir aser iba sempet anguri pa taküm piyong medical treatment angati agitsü akok aser ibaji sorkari menoktsü.

Külen, Asom Sourav award atema nisung pezü shimogo aser parnokji- Krishna Roy, Gilbert Sangma, Dr Binoy Kumar

Saikia aser Dr Sashidhar Phukan nunger lir.

Asom Sourav award angur nem Rs 4 lakhs senpet agütsür aser küm nung Rs 3 lakhs tashi medical treatment agitsü akok aser ibaji sorkari menoktsü.

Ano, Asom Gourav award atema nisung 13 shimteta lir. Parnokji Debajit Barman, Rustom Basumatary, Manje La, Binanda Hatibaruah, Atul Ch Baruah, Shila Gowala, Dr Jogesh Deuri, Dr Pankaj Lal Gogoi, Sarbeswar Basumatary Manthang Hmar, Dayal Goswami, Dr Syed Ifthikar Ahmed aser Dr Dhrubajyoti Sharma nunger lir.

Asom Gourav award anger shiai küm nung Rs 3 lakhs tashi medical treatment agitsü akok aser senji sorkari menoktsü.

Meghalaya MLA 3-i National People's Party nung adentsü

Shillong, January 4, 2023

(Agencies): Meghalaya nung MLA aseml Conrad Sangma-i aniba National People's Party (NPP) nung adentsü. Parnok rongnung cabinet minister ka dena lir.

MLA asemji Myllem MLA & cabinet minister Hamletson Dohling, Umsning MLA Jason Sawkmie Mawlong aser taoba Cabinet Minister Samlin

Malngiang nunger lir.

Myllem MLA Hamletson Dohling-i January 7, Umsning MLA Jason Sawkmie Mawlong-i Hokolbarnü aser taoba Cabinet Minister Samlin Malngiang-i January 10 nü NPP nung adentsü ta osang angazüker.

Hamletson aser Jason na ya People Democratic Party (PDF) nungi aser Malngiang ya

Hill State People's Party (HSPDP) nungi lir.

Meghalaya nung assembly elections agitsü jakdang Congress MLA Kimfa Marbaniang-i December 29 nü National People's Party (NPP) nung aden.

Ano, December 19 nü East Shillong Constituency nungi Congress MLA Dr Ampareen Lyngdoh-ia party toktsü.



United Nations, Jan. 4 : Kazakhstan indang permanent representative Akan Rakhmetullin (abelen nungi asembuba) aser UN Security Council züngsem tasen pungo January 3, 2023 nü New York nung aliba UN headquarters nung nisan inokba sentong nung adendang tangokba noksa nung angur. Linük pungo -- Ecuador, Japan, Malta, Mozambique aser Switzerland - ya United Nations Security Council indang non-permanent members ama Mongulbarnü nungi tenzuka par mapa inyaker.

US House nung speaker tasen meshimteti lir

Washington, Aenjeti/ January 04 (Agencies): Küm noklang ka jungnüa nung tang mezüngbuba United States indang House of Representatives nung mezüngbuba voting nung speaker ka meshimteti, kechiaser Democrat Nancy Pelosi melentsü asoshi chamber nung nüngdakba ama Republican Kevin McCarthy-i vote mongutet.

Mongulbarnü vote agitepba mapang opposition koktettsüsa McCarthy-i par telok rongnung vote mongutet aser legislator temi House indang mezüngbuba senden anentsü vote agüja liasü.

November ita midterm elections nung Republican temi tera agi chamber nung takok ngutet saka McCarthy'er telok nung right-wing legislator kari speaker atema pa busemtsü memolung.

Senden nung metentetba legislator tem maden speaker-i vote timba ngutettsüla. Mongulbarnü McCarthy-i vote 218 nüngdaka liasü saka pai vote 203 dang ngutet, kechiaser mezüng ballot ana nung Republican nungi par 19-i pa anema vote agütsü. Round tasembuba nung ano pai vote ka samaa vote 202 dang ngutet.

Mezüng vote agitepba nung Republican timbai Arizona Representative Andy Biggs mesüra Ohio Representative Jim Jordan busema liasü. Round tanabuba nung Republican nungi par telok nem magütsüner vote 19 Jordan nem agütsü. Round tasembuba nung Jordan-i vote

20 nguteta liasü. Mongulbarnü vote agütsü metenzükdang far-right Congressman Paul Gosar-i candidate ka ama Biggs shimteta liasü. Saka Jordan-i speaker menden mebushi aser paia asemben McCarthy nem vote agüja liasü.

Round tanabuba nung Jordan-i maneni McCarthy shim aser iba temelen ultraconservative Florida Congressman Matt Gaetz-i Jordan shima Ohio nungi shimsangi iba mapa meinyakner, ta shia liasü.

House nung asemben vote agütsüba shia Democratic lenir Hakeem Jeffries-i vote 212 nguteta liasü - McCarthy dang timba - saka par party ya minority nung lir asünung pai asangdang nung kodanga metoktep.

McCarthy ya California Republican lir aser 2019 küm Democrats tem timba akumba sülen pa House minority leader ka ama inyaka liasü.

Legislator tem Bodhbarnü maneni adenshia speaker atema candidate kati majority timba mongutet tashi vote agütsüteptsü. Speaker tasen ka mali tashi House nung mapa kecha meinyaktsü.

US tir melentsü asoshi speaker ya tasembuba jenjang nung lir aser linük nung tashi tulutiba legislator ka lir, aser bill mesüra ozüng balala agizüktsü asoshi pa dak tashi lir.

Chamber ana agi US Congress akumer aser House ya ka lir. Iba den Senate ajanga

federal legislation agizüker, sorkar senotsü indokba lemsatsür aser ketdang asür.

Voting mezüng round agiba sülen Arizona Republican Biggs-i McCarthy dang Republican temi nem ano lenir tasen ka shimdaksütsü ashi.

McCarthy-i speaker inyaktsü asoshi toktepba nung yaritsü atema mesüzüktsü meranga liasü.

Pai Tir Joe Biden'er jabaso Hunter Biden-i inyakba shishilempaba maparen bushisüngdangtsü densema right-wing züngsemtem dak rangloktü nangzük.

McCarthy-i Department of Homeland Security Secretary Alejandro Mayorkas dang southern border nung migration junga ketdang masüba mechi mapa nungi anentsü ashi aser pa anema ken o benoka mapa nungi tashiyim amshia anentsütsü amokmerena liasü.

Ano Yihuda nunger anema aser Islamophobic o jembiba mechi 2021 küm congressional panels ajanga anentsüla Georgia Congresswoman Marjorie Taylor Greene ya tanaben shimshitsü pai nangzük.

Ajisüaka McCarthy-i far right nungi opposition tem maziüktet.

Republican temi speaker ka shimtsü asoshi tangatetep kati marutetba ya GOP tamakok sayur, ta Democrats temi ashir.

"Asen linük asoshi item ya kata tajung mali. Kata mali," ta Democratic Senator Chris Murphy-i social media post ka nung zülutsü.

TEPELA LEMSATEPER



ASÜ :
03.03.1963

ASÜ :
23.12.2022

Onoki teti meima alila asür Likhala Sangtam, shirangba mapang nungi tasüba anogo tashi nung kija aser lokti tentet balala shirnokisa nübu den rongsen aser shisatsü tajung agi ozü kibong den yaritepogo, nenok ajak dang tebang agi meshitetba pelaba lemsateper.

Temeim kinungbo, adianutem, anükapang aser kinungertem

Somalia nung civilian teku pokset

Mogadishu, Aenjeti/ January 4 (Agencies): Central Somalia kübok Hiraan tesem nung Bodhbarnü gari nung inoker bomb ana pokdaksüba sülen nisung aika süogo aser ki kar ajasaogo, ta security ketdangsürtem aser tenük kuli agütsürtemi ashi.

"Tanep bomb tesashi ana apokba sülen onok sak," ta iba tesem nung alir Ahmed Nur-i Reuters dang ashi. "Onoki ki aika ajar aliba nguogo. Civilian, seapitem aser telungpurtem densema nisung 10 shi süogo," ta pai ashi.

Iba lendong nung nisung asüba osang ya telungpur aser local ketdangsürtemi balala agütsür.

Mahas district atema Macawisley otongdar Farah Abdullahi-ia iba lendong nung nisung 10 asü ta shia liasü. Local security ketdangsür Abdullahi Adan-i AFP dang ashiba agi, bomb apokba lendong nung nisung teku asü.

Al-Shabab media office sangdong ka ajanga iba bombo pokdaksüba ya parnok mapa ta shia nangzükogo aser ashiba agi, parnoki taoba mapang telungpur alirtem aser sepaitem dak rangloker iba bomb pokdaksü.

Al-Qaeda den sendaktepa aliba telok ya 2007 küm nungi tenzuka Somalia sorkar den rara arudar. Parnok ya taoba küm sorkar sepaitem aser Macawisley ta nungja agütsür aliba telok ka senteper Hiraan nungi mintoka liasü, ajisaka parnoki maneni tesem balala maka arudar.

Mahas District Commissioner Mumin Mohamed Halane-i state radio dang ashiba agi, bomb ka par ki dak rangloker pokdaksü aser tanabuba bomb ya federal lawmaker ka kidang pokloktü.

Taoba küm August ita tir Hassan Sheikh Mohamud-i office mapa agizükba sülen mapang tatsüka dang lir military operation ka tenzük aser iba ajanga Al-Shabab pur

kanga nongshia arudar.

"Kiralongrartem tamakok anguba sülen parnoki civilian tem amak tenzükogo, saka iba ajanga parnok samatsütsü asoshi nüburtem tejangraba aliba mesamadaksütsü," ta Mahas nung police ketdangsür Osman Nur-i AFP dang ashi.

"Parnoki tai maketba civilian tem tepsetogo," ta pai ashi.

Sorkari ashiba agi parnoki al-Shabab telungpurtem noklang aika tepsetogo aser parnoki atsünger aliba tesem aika meyipa agiogo, ajisüka telok ana yagi mapangshia osang balala agütsür.

Sorkar sepaitem aser Macawisley telok nem United States aser African Union sepaitemi teyari agüja liasü.

Al-Shabab pur atsüngtoktsü atema kanga merangaka parnok tesem aika nung maneni inyaksangshidar aser parnoki linük yimtiba Mogadishu densema tesem balala mapang shia maka arudar.

October 29 nü education ministry nung bomb ana tashi pokdaksüba sülen nisung 116 asü aser November 27 nüa hotel ka ghonda 21 tashi sabanga ayuba sülen civilian ti asü.

Al-Shabab pur inyakyim ajanga international teyaritem sadem sadema magütsüteti arudar aser iba ajanga küm 40 tsüngda iba linük nung tang tsüngsarusa tamajungtiba ataloker aliba tamajungba kümshidaksür.

Ibayongji linük nung tesem aika nung chiyongtsü agi anünga kümogo aser taruba itatem nung ayawara agi meneptsü ana nung lir ta UN aser mongintemi metetdaksüogo.

Tzünglurowa pongu tashi nung tzünglu maruba aser Ukraine nung tang rara adoker aliba ajanga supply nung tetsükdaksü adoka chiyongtsü jenjang aika kümogo aser iba ajanga nisung million 8 dak tema kanga timtemtepdar.



Ukraine yimtiba, Kyiv kübok Solomyansk district nung Russia nunger missile khaloktsüba ajanga teraksa adoker alidak nüburtem senzüba noksa nung angur. Iba tesem nung ki-o-jen raksar aliba yanglushiba maparen maneni inyaker. Küm tasen tenzükba sülen Russia-i Ukraine nung missile 20 dak tema khaloktsüogo aser drone 40 shi yoka civilian alidak tesemtem nung amaker.

15th UYC Open V/ball Championship Citizen Club A-i benogo



UYC-i ayongba 15th Open V/ball Championship Moalenden yim dak takok ngua tembanger külen, senpet agütsüba sentong akadang tangokba noksa nung angur. Mokochung, 4th January, 2023.

Mokochung, Jan 4, 2022 : United Young Club-i ayongzükba 15 buba Open Volleyball Championship 2023, Jan 3 & 4 anogo ananü Moalenden yim dak takok ngua asayaa mungogo. Taküm iba asayamung nung telok 8-i shilem agia liasü.

Tesüsubaba (final) match Citizen Club 'A' aser Eagle's Club 'A' tsüngta asayaba, Citizen Club 'A'-i koka taküm

iba asayamung marok parnoki benogo. New Chungliyimti-i tasembuba jenjang ajangzükta liasü.

Iba asayamung shibangba aser senpet agütsüba sentong nung Mokochung District Martial Art Association (MDMAA) President, Rongsentoshi Jamir, tetushi tesem danger arua merakettsü.

Iba asayamung nung tanga

senpet agizükertem:

- Best Team - Lion's Club
- Best spiker- Reshitemjen (Eagle's A)
- Best setter- Akangtoshi (Citizen Club A)
- Best libero - Chubamanen (Eagle's A)
- Emerging Player- Kimongsosang (Eagles A)
- Player of the tournament - Yongkongtenzük (Citizen Club A)

Rishabh Pant Mumbai-i anir aotsü; surgery agitsü: BCCI

New Delhi, Aenjeti/January 4 (Agencies): India nunger cricket asayar Rishabh Pant, ligament yirur aliba surgery agitsü, ta BCCI-i Bodhbarnü sangdong ka ajanga metetdaksü. Iba ajanga pa mapang talangka cricket asaya nung shilem magitetsüsa kümogo.

Pant ya Dehradun nung mozüki ka nungi Mumbai-i anirogo, kong pa temekok aser tetsüng teloktepba nung ligament yirur aliba atema treatment agitsü, ta BCCI secretary Jay Shah-i ashi. Pant ya December 30 nü gari tsükokba lendong ka nung densemba sülen yirua liasü.

BCCI-i pa air ambulance ka nung Mumbai-i anir aotsü telemtetba agi, kechiyong pa commercial airline nung senzüttsüsa jenjang ka nung mali.

"Rishabh, shiba December 30 nü gari tsükokba sülen yirur tang Max Hospital, Dehradun nung temang anepaludar pa

Mumbai-i air ambulance ka nung angir arutsü," ta Shah-i ashi.

Pant ya nüngtugu sports orthopaedic surgeon Dinshaw Pardiwala-i anepalutsü.

"Pa Kokilaben Dhirubhai Ambani Hospital and Medical Research Institute-i anir aotsü aser mozüki nung Centre for Sports Medicine, and Director - Arthroscopy & Shoulder Service tekolakba Dr Dinshaw Pardiwala-i anepalutsü," ta paisa ashi.

"Rishabh surgery agitsü aser pa ligament yiruba ya manep tashi BCCI Medical Team-i asadanga atatsü.

"Rishabh temang takaratiba nung tajungba kümdaktsütsü atema board-i takokba tashi inyaksü aser pa temang anepaluba mapang nüngdakba teyari ajak agütsütsü," ta pai shisem.

Arishi küm 25 tain Pant ya Delhi nungi Rourke nung par

kidangi aoba mapang NH-58 nung pai ania aliba gari maziükteti divider nung oa atsük.

Pant tenütsü yiru aser iba den teberemlena terara yirua liasü, aser iba den temekok aser tetsüng teloktepa yirua liasü.

Temang nung telen balala yiruba atema shisabulu kangabo mali, saka pa temekok aser tetsüng teloktep yiruba ya shisabulutsü keta lir.

Pa centrally-contracted cricketer asünung, pa temang anepaluba ajak ya board-i anepalutsü.

Pa temekok aser tetsüng teloktep yirur aliba ya MRI agitsü akok, kechiyong temekok aser tetesüng teloktep kanga waker aliba ajanga koba tashi yirur ali aji mejangjar.

Gari tsükokba lendong nung yiruba sülen Pant Australia den kidang Test asaya nung aser Indian Premier League nung shilem magitetsüsa kümogo.

Djokovic Indian Wells & Miami nung masayatetsü akok

Aenjeti/January 4, 2023 (Agencies): United States nung lisopur masürtem ajak vaccine agirang linüki aitdaksütsü atema telemtetba agiba sülen Novak Djokovic, March ita asayatsü aliba Masters 1000 tournament ana nung masayatetsü akok.

US nung Transport Security Administration (TSA)-i April ita 10 nü tashi bendanger shirnoksa linüki arudir parnok ajak COVID-19 vaccine anabosa agir alitsüla ta sangdongogo. Iba ya alima ajunga nung inyaksangshi den balaka lir, kechiyong Djokovic tang Australia nung tasayadak lir. Taoba kümbo pa vaccine magiba atema Australia nungi meyipa yoka liasü.

Taoba küm US nung masayatetba ajanga Djokovic asayamung aika nung shilem magitetsü liasü aser taküma vaccine magiba atema taitok balaka magütsüra pa Indian Wells aser Miami Masters nung kuma anabuba atonga masayatetsü.

Arishi küm 35 tain asayar yagi Indian Wells ponguben aser Miami Masters trokben koka lir. 2022 küm pa vaccine magiba ajanga Masters 1000s asayamung pezü aser Grand Slam ana nung shilem magitetsü liasü.

Iba ita tatemlen Djokovic-i Australian Open 10buba koka otsü tasen ka yanglutsü merangtsü. Pa tang taküm atema mezüngbuba Grand Slam masaya tsüngda Adelaide nung asayamung ka nung shilem agidar. Taoba küm mepetmesü tulu adoka pa Australia nungi meyipa yokka sülen taküm nüburtemi pa kanga pelashishia agizükba atema pa kanga pelaba lemsatepa liasü.

"Australia nungi ni kanga junga asaya arudar aser idaki arua asayatsü yongya atar. Taoba küm kechi mepetmesü atalokogo iba tatalokba ya ajak atema temela masü asü saka taküm meyipa arutetba atema pelar," ta pai mezüngbuba round nung Constant Lestienne akokba sülen ashi.



Boxer Mary Kom den Ice Skating Association of India tir Amitabh Sharma aser tanga ketdangsürtem Gurugram nung 18buba National Speed and Figure Skating Championship mascot; Ballo sayaba sentong nung tangokba noksa nung angur.

Gary Ballance Zimbabwe T20 squad nung züngoksemogo

Aenjeti/January 4, 2022 (Agencies): Taoba England batsman Gary Balance, Ireland den asayatsü aliba T20 asayamung atema Zimbabwe team nung züngoksemba Bodhbarnü sangdongba sülen pa tang mezüngbuba Zimbabwe team nungi asayatsü.

Arishi küm 33 tain left-handed batter yagi taoba ita küm ana atema Zimbabwe nung domestic aser international cricket asayatsü atema tenangzüktepba ka yanglua liasü. Pa county cricket club Yorkshire nungi chiokba sülen Gary ya Zimbabwe nung asoba asayar ka lir.

September ita Australia nung World Cup asayaba team nungi Ireland den Harare Sports Club nung asaya asem asayatsü aliba atema asayar pezü melenba nung pa-a densema lir. Iba asayamung ya January 12 nungi 15 tashi asayatsü.

Zimbabwe Cricket-i, Zimbabwe nunger all-rounder asayar Sikandar Raza nem iba

ita Bangladesh nung oa franchise cricket asayatsü atema temelaba agütsüba sülen Balance ya team nung anioka liasü.

Balance-i 2014 nungi 2017 tsüngda England team atema test 23 nung asayaogo, kong pai century pezü densema run 1,498 yanglua liasü. Maneni pa one-day internationals asaya 16 nunga asayaogo, saka linük melener asayatsü atema temelaba agütsüogo.

Harare nung asoba asayar ya taoba küm mental health timtem ajanga masayai liasü. Pai taoba Yorkshire team mate Azeem Rafiq mezüngmeshia jembiba nangzükba sülen iba tia-i ia liasü.

Yorkshire puri Balance-i asüngdangba ama pa contract atemtsü küm ana lia pa chiokatok aser club nung institutional racism aliba indang Rafiq-i ashishiba sülen club-i inyakyim nung temelenshi bener arua liasü.

Balance-i Rafiq dang tatok meshiogo.



FIH Hockey Men's World Cup 2023 atema Bhubaneswar nung Biju Patnaik Airport tonga aruba sülen Netherland hockey team noksa agiba yangi angur.

BILEMDANGANG
"Arishiküm taküm mapang rongsen ajak asenok meyong masü."